



FOTOAM-BAVAKA Zoma 29 janoary 2021

Fiarahabana

Vavaka

**“ NY FANABEAZANA NY APOSTOLY ROA AMBIN’NY FOLO
SY NY MPIANATRA araka ny Marka 6.1-56.”**

Hira : 635 :1 Aina no fetra

Vakiteny 1. Marka 6.1-13

1 Ary niala teo Izy ka tonga tany amin’ ny taniny, sady nanaraka Azy ny mpianany.2 Ary rehefa tonga ny Sabata, dia nampianatra tao amin’ ny synagoga Izy; ary maro izay nihaino Azy dia talanjona indrindra ka nanao hoe: Taiza no nahazoan’ ilehity izany zavatra izany, ary manao ahoana ny fahendrena nomena Azy sy izao asa lehibe ataon’ ny tånany izao?3 Tsy ilay mpandrafitra, zanak’ i Maria, ary rahalahin’ i Jakoba sy Josesy sy Jodasy sy Simona va Ilehity? Ary tsy etỳ amintsika va ireo anabaviny? Dia tafintohina taminy izy.4 Fa hoy Josesy taminy: Tsy misy mpaminany tsy hajaina afa-tsy eo amin’ ny taniny sy ny havany ary ny ankohonany ihany.5 Ary tsy nahazo nampiseho hery akory Izy teo, afa-tsy ny nametraka ny tånany tamin’ ny olona marary vitsy foana ka nahasitrana azy.6 Ary gaga Izy noho ny tsi-finoany. Dia nitety ny vohitra manodidina Izy ka nampianatra.7 Ary niantso ny roa ambin’ ny folo lahy hankeo aminy Izy ka naniraka azy tsiroaroa sy nanome azy fahefana hamoaka fanahy maloto.8 Ary nandrara azy Izy mba tsy hitondra zavatra ho any amin’ ny halehany, na hanina, na kitapo, na vola ao amin’ ny fehin-kibony, afa-tsy tehina ihany.9 Fa asio kapa ny tongotrareo; ary aza mitondra akanjo roa.10 Ary hoy koa Izy taminy: Izay trano hidiranareo, dia mitoera ao mandra-pialanareo any.11 Ary izay tanàna tsy hampandroso anareo, na tsy hihaino anareo, raha miala hianareo, dia ahintsano ny vovoka ao am-paladianareo ho vavolombelona aminy.12 Dia lasa nandeha izy ireo ka nitory fa tokony hibe-baka ny olona.13 Ary demonia maro no navoakany; ary nohosorany diloilo ny marary maro ka nositrany.

Hira : 635 :3,4 Ianao ry Jeso no ilay Kapiteny

Vavaka

Mba tsy ho sodokan'ny fankafizana ny tenin'Andriamanitra sy ny famantarana isika fa ho mpankato sy manaiky hovàn'ny tenin'Andriamanitra ka ho afaka ho iraky ny Tompo ho eo amin'izao tontolo izao.

Mba hitafy ny fahavonona mandrakariva isika hitory sy hiasa rehefa mandre ny baikon'ny Tompo, ka hatoky fa ny fanekena no antsika fa ny fiantohana na ny fahaizana na ny hery dia Azy Tompo.

Vakiteny 2. Marka 6.14-29

14 Ary nahare izany Heroda mpanjaka (fa efa nalaza ny anaran' i Jesosy), dia hoy izy: Jaona Mpanao-batisa efa nitsangana tamin' ny maty izay, ka izany no ananany hery hanao ireo asa lehibe ireo.15 Fa hoy ny sasany: Elia Izy; ary hoy ny sasany: Mpaminany Izy dia toy ny anankiray amin' ny mpaminany.16 Ary rehefa nahare izany Heroda, dia hoy izy: Jaona izay, ilay notapahiko ny lohany; efa nitsangana izy.17 Fa Heroda ihany no naniraka sy nisambotra an' i Jaona ka namatotra azy tao an-trano-maizina noho ny amin' i Herodiasy vadin' i Filipo rahalahiny; fa nanambady azy izy.18 Fa Jaona efa nilaza tamin' i Heroda hoe: Diso hianao, raha manambady ny vadin' ny rahalahinao.19 Ary Herodiasy dia nanao otri-po taminy ka naniry hahafaty azy, nefa tsy nahazo.20 Fa Heroda natahotra an' i Jaona, satria fantany fa lehilahy marina sy masina izy, ka dia niaro azy izy; ary rehefa nandre azy izy, dia very hevitra be ihany; ary nihaino azy tamin' ny hafaliana izy.21 Ary rehefa tonga izay andro antonona, dia ilay nanaovan' i Heroda fanasana ho an' ny lehibe sy ny mpifehy arivo ary ny loholona tany Galilia tamin' ny andro fahatsiarovana ny nahaterahany,22 ka niditra ny zanakavavin' i Herodiasy ary nandihy ka nahafaly an' i Heroda mbamin' izay niara-nipetraka nihinana teo aminy, dia hoy ny mpanjaka tamin-drazazavavy: Angataho amiko izay tianao na inona na inona, dia homeko anao.23 Ary nianiana taminy hoe izy: Na inona na inona hangatahinao amiko dia homeko anao na dia hatramin' ny antsasaky ny fanjakako aza (fihetseham-po tsy ampy fieritreretana, ho malai-miteny).24 Dia nivoaka razazavavy ka nanao tamin-dreniny hoe: Inona no hangatahiko? Ary hoy reniny: Ny lohan' i Jaona Mpanao-batisa.25 Dia niditra faingana niaraka tamin' izay izy ho ao amin' ny mpanjaka ka nangataka hoe: Tiako raha homena ahy faingana eto an-dovia ny lohan' i Jaona Mpanao-batisa.26 Dia nalahelo indrindra ny mpanjaka, kanefa noho ny fianianany sy ny olona izay nipetraka nihinana teo, dia tsy sahy nandà azy izy.27 Ary niaraka tamin' izay ny mpanjaka dia naniraka mpiambina, ka nasainy nentiny ny lohan' i Jaona. Ary dia nandeha izy, ka notapahiny tao an-trano-maizina ny lohany.28 Dia nentiny teo an-dovia ny lohany ka nomeny an-drazazavavy; ary razazavavy kosa dia nanome azy an-dreniny.29 Ary rehefa nandre izany ny mpianany, dia tonga ka naka ny faty ary nandevina azy.

Hira : 203 :1,2 Ry Rainay be fitia

Vavaka

Mifona isika ny amin'ny ota niteraka ota teo amin'ny fiainantsika.

Mifona isika ny amin'ny nandehanantsika tamin'ny fihetseham-po sy ny saina araka ny maha-olona fotsiny ka tsy nahefantsika izay nandrasan'Andriamanitra tamintsika.

Mangataka isika mba hahay hiambina hatrany ka ho mailo manoloana ny sitrapon'Andriamanitra sy ny fandrik'ilay ratsy.

Vakiteny 3. Marka 6.30-46

30 Ary ny Apostoly niangona teo amin' i Jesosy ka nilaza taminy izay rehetra efa nataony mbamin' izay nampianariny (nitatitra, nilaza, nitory).³¹ Ary hoy Jesosy taminy: Avia hianareo hitokana any an-tany foana, ka mialà sasatra kelikely (fa maro no nifamoivoy, ka tsy nisy hihinanana aza).³² Dia nandeha an-tsambokely izy hitokana any an-tany foana.³³ Ary ny olona nahita azy mandeha, sady betsaka no nahalala an' i Jesosy, dia niala avy teny amin' ny tanàna rehetra ny olona ka nihazakazaka nandeha an-tanety, dia tonga talohany.

34 Ary nony niala Jesosy, dia nahita vahoaka betsaka Izy ka **onena** azy, fa tahaka ny ondry tsy manana mpiandry ireo; dia nampianatra azy zavatra maro Izy.³⁵ Ary rehefa hariva ny andro, dia nanatona Azy ny mpianany ka nanao hoe: Tany foana ity, ka efa hariva ny andro ankehitriny;³⁶ ravao ny olona mba hankanesany eny an-tsaha sy eny amin' ny vohitra manodidina hividy hanina ho azy.³⁷ Fa Izy namaly ka nanao taminy hoe: Omeonareo hanina izy (ny hanina isan'andro, fahano àry ny ondriko). Fa hoy kosa izy ireo taminy: Handeha hividy mofo izay azon' ny denaria roan-jato va izahay, ka homenay azy hohaniny?³⁸ Fa hoy Izy taminy: Misy mofo firy any aminareo? Andeha, **izahao**. Ary rehefa fantany, dia hoy izy: Dimy sy hazandrano roa.³⁹ Dia nasain' i Jesosy nampipetraka ny olona rehetra hatao an-tokotony eny ambonin' ny ahi-maitso izy.⁴⁰ Dia nipetraka an-tokony zato sy dimam-polo avy ny olona.⁴¹ Ary rehefa voarain' i Jesosy ny mofo dimy sy ny hazandrano roa, dia niandrandra ny lanitra Izy ka nisaotra, dia novakiny ny mofo ka natolony ny mpianatra mba harosony eny anoloan' ny olona; ary ny hazandrano roa nozarainy tamin' ny olona rehetra.⁴² Ary samy nihinana avokoa ny olona rehetra ka voky.⁴³ Ary nangoniny izay sombintsombin' ny mofo sy ny hazandrano, ka dia nahafeno harona roa amin' ny folo.⁴⁴ Ary izay nihinana ny mofo dia dimy arivo lahy.⁴⁵ Ary niaraka tamin' izay Jesosy dia nanery ny mpianany hiondrana an-tsambokely hita hialoha ho any Betsaida, mandra-pandràvany ny vahoaka.⁴⁶ Ary rehefa nanao veloma ny olona Izy, dia lasa nankany an-tendrombohitra hivavaka.

Hira : 444 :1,4 Ry Raiko feno antra

Vavaka

Ho an'ireo sahirana indrindra manolona izao valan'aretina izao.

Ho an'ireo vahoaka any atsimon'i Madagasikara manolona ny Kere

Ho an'ireo marary isan-karazany

Ho an'ireo namoy havana.

Vakiteny 4. Marka 6.47-56

47 Ary nony hariva ny andro, dia efa mby teo ampovoan' ny ranomasina ny sambokely, ary Izy irery ihany no teo an-tanety.⁴⁸ Ary nahita azy ireo sahirana nivoy fatratra Izy, fa notohain' ny rivotra: ary tokony ho tamin' ny fiambenana fahefatra amin' ny alina dia nankeny aminy nitsangantsangana tambonin' ny ranomasina Jesosy ka nikasa handalo azy.⁴⁹ Ary rehefa hitany nitsangantsangana tambonin' ny ranomasina Izy, dia nataony ho matoatoa, ka niantso mafy izy ireo.⁵⁰ Fa izy rehetra samy nahita Azy avokoa, ka dia raiki-tahotra. Ary Izy niteny taminy niaraka tamin' izay ka nanao taminy hoe: Matokia, fa Izaho ihany; aza matahotra.⁵¹ Ary niakatra nankeo aminy teo an-tsambokely Izy; dia nitsahatra

ny rivotra, ka dia talanjona izy ireo.⁵² Ary tsy fantany ny amin' ny mofo; fa efa mafy ny fony.⁵³ Ary nony tafita izy, dia tonga teo amin' ny tany Genesareta ka niantsona teo.⁵⁴ Ary raha niala teo an-tsambokely izy, dia nahalala an' i Jesosy niaraka tamin' izay ny olona teo⁵⁵ ka nihazakazaka tamin' izany tany rehetra izany ary nitondra ny marary tamin' ny fandriana ho any amin' izay reny fa nitoerany.⁵⁶ Ary na taiza na taiza no nidiran' i Jesosy, na tao amin' ny vohitra, na tao an-tanàna, na tany an-tsaha, dia napetraka teo an-kianja ny marary, ary ny olona nangataka hanendry na dia ny somotraviavin-dambany ihany aza; ary sitrana izay rehetra nanendry Azy.

Hira : 508 :1,2 Ny sambokelinay ety

Vavaka

Vavaka malalaka faranana amin'ny Vavaka nampianarin'ny Tompo.

FEHINY Matio 28.18-20

Ary Jesosy nanatona dia niteny taminy ka nanao hoe: Efa nomena Ahy ny fahefana rehetra any an-danitra sy etỳ an-tany; koa mandehana hianareo, dia ataovy mpianatra ny firenena rehetra, manao batisa azy ho amin' ny anaran' ny Ray sy ny Zanaka ary ny Fanahy Masina, sady mampianatra azy hitandrina izay rehetra nandidiako anareo; ary, indro, Izaho momba anareo mandrakariva ambara-pahatongan' ny fahataperan' izao tontolo izao.

Hira : 313 : 1,3 Miantrà ny firenena

Tsodrano 2Kor.13.14

Ho aminareo rehetra anie ny fahasovan' i Jesosy Kristy Tompo sy ny fitiavan' Andriamanitra ary ny firaisana amin' ny Fanahy Masina.